

SAN PABLO CARTA FILEMON JÏI

Pablo' Filemona's fi'jni

¹ Andya' Jesucristo jycaajni yuwe ewsa's pta'shpa'garráa preesu üstju, nava naa carta's fi'jatstju yacjtjê'j Timoteo yacj, cue'sh yacj mjïisa Filemon indya's wechana. ² Vite' cue'sh npe'sh Apia vite' yacjtjê'j Arquipo cue'sh yacj mjïisa vite' iindy yatte pcjaacjesawe'sh tyäawe'shtyi wechanatj fi'ja'. ³ Dyus cue'sh Tata vite' cue'shtyi jype'jsa Jesucristo tyäawe'sh pu'chni wêt mfi'nze.

Filemona' Cristo's üusuj jyuca yajcyna vitetyva peeygãani

⁴ Bagachteva Dyus yacj puuty we'we iisatj indya's yajcyna Dyusa's wechá'. ⁵ Tyä'wê Jesucristo's yuurráa yajcyna yacjtjê'jwe'sh jyucaysatycu peeygãjna fi'nze' jïni's jiyurratj tyä'wê wechá'. ⁶ Indy tyä'wê Dyus yacj fi'nzepa'ga viteva Dyusa's jypa'gasa üsta' tyäawe'shva Cristo Jesus quijteva jyuca pu'chni's ew jiyucajntju Dyusa's neewe'we'. ⁷ Andya's iiméj wala wech wecha üusutjec yacjtjê'j iindy peeygãani's jiyute', tyäa pa'gatey tyä'wê iindy pa'garráa viteva tyäawe'sh üuste wêt-sa's jypa'gaty naa pa'ga.

Pablo Filemona's neewe'weni Onesimo's ewrráa jypa'gacajn

⁸ Andya' Cristo caajnisatj na' indya's juuna' jycaajya' äjawa'jsatj. ⁹ Nava indy tyä'wê ewstate jïirra', juuna' we'wemée peeygãjnarráatj we'we', andya' Cristo Jesusna selpiipa'ga preesu üstju tjê'cjue yäl'jsa. ¹⁰ Tyäasatj indya's pu'ch jytjäasu' Onesimo's ewrráa yüuna. Tyä'sa' andy nchi'c na'wésatj Dyus jïi cnay ay carcelte üsrrava. ¹¹ Nyáfii yu' indyna selpisáa Onesimo' seelpimeesac yuu. Nava ächja' wala seelpisa' andy yacj vite' indy yacjva. ¹² Tyä'sna iindy tashte qui' cajtatstju atsa' miipa'ga andy yuu cytee pa'jats na'wê. ¹³ Andya' Dyus yuwe's pta'shpa'ga ay carcelte üstju atsa' andyna pi'cyna üswa'jsa Onesimo's caajmeevats wejy ewna, indya' andy yacj pi'cyna üsya' äja'tsmeeng atsa' Onesimo üscajn. ¹⁴ Nava tyä'wê

yūu wēemeetj, indyna caajiyu'jmey yu', cyaj indy andyna pu'ch wēerra' pu'chjine'nga Onesimo's caapi'qui'jna. Nava indya's tyā'wē myūu jīna yu' jytjāasutsmeejt. ¹⁵Onesimo' iindy tashu manz en yu' tyuteene!, naajūyā'ja' peena yu' bagachte yujva tyuteeya'mée. ¹⁶Nava āchja' selpiisáa na'wēmée, wejyva selpiisaate jytjaacue yacjtjē'j peeygāanisa na'wē ew indy jype'cjan ne! tyā'wē yūu. Andya' Onesimo's wala peeygāja'tj, atsa' indya' wejy jytjaacue peeygāawa'lj jipjngu, Onesimo' iindy jype'jnisac yu' nava āchja' tyā'wērráamée, iindy yacjtjē'ja' Cristo's jiisapa'ga.

¹⁷Indya' andya's namicu na'wē dyij yaaquitsrra', Onesimo's miipa'ga, andy pa'jvats ma'wē wechana jypa'gaqui'ng tyā'wē yajcyna miipa'ga. ¹⁸Indya's ājmée vá' yuu, meerra' yuulváana atsa' andyna yuula's pēyine'nga. ¹⁹Yuula's ducje'nja jīna Pablo andy cuseju fi'jni's uyrra', wejy yuuva andy tyā'wē Pablo's yuultju ew yūupa'ga sūjune'nga. ²⁰Yacjtjē'j, tyā'wē andy neewe'weni's cytey meen yuu, Onesimo's jypa'gana Dyusa's jiisa na'wē. Tyā'wē yūurra', andy ūuste wētwtēt caayaqui'jine'nga.

²¹Tyā'jīnatj fi'ja'. Indya' cytey yuune'nga sa' andy jytjāasnite jytjaacue ew yūuwa'ja's jiirratj tyā'jī'. ²²Tyā'wērráa yūumée, andy pa'jwa'ja'sva ūytjasna mes. I'cue'sh tyā'wē Dyus yacj puuty we'wena ūste', Dyusa' cajaváana atsa' maa enteya' shawendu'nja i'cue'shtyi tjengya'.

Yuwe wechaa caajnity pta'shna fi'jni

²³Cristo Jesusna selpiipa'ga carcelte andy yacj pi'cyna ūssa Epafrasva yuwe wechaa caja'c, ²⁴vite' Marcos, Aristarco, Demas, Lucas tyāawe'shva mjīi pu'chsata' sa' wechaa caja'ty.

²⁵Cue'shtyi jype'jsa Jesucristo' i'cue'shtyi pu'chjina.